



DEKLARASAUN HIRAK BA IMPRENSA IHA OKAZIAUN VIZITA S.E. SEÑOR JOKO WIDODO, PREZIDENTE REPÚBLIKA INDONÉSIA NIAN

Eselénsia, Señor Joko Widodo, Prezidente Repúblika Indonésia

Jornalista sira

Señora no Señor sira.

Ksolok boot no priviléjiu ida mai hau bainhira simu Eselénsia Señor Joko Widodo, Prezidente Repúblika Indonésia nian.

Onra ida mai ami tanba Eselénsia Señor Prezidente bele mai vizita Timor-Leste iha durante ninia primeiru mandatu

Vizita Señor Prezidente nian ne'e refleto no reforsa lasu hirak pozitivu no forte ne'ebé eziste entre nasaun rua ne'e.

Nia hit-an mai hafoin Prezidente Taur Matan Ruak ba tuir serimónia tomada pose Prezidente Widodo nian, iha outubro 2014.

No hafoin ha'u vizita iha agostu tinan liu ba – vizita ofisiál ba da-uluk desde ha'u simu knar hanesan Primeiru-Ministru.

Ami sente sensibilizadu tanba Señor Prezidente vizita Timor-Leste hafoin mosu atentadu terrorista iha Jakarta, iha semana kotuk.

Ha'u sente gratu tanba bele hetan oportunidade atu, ha'u pesoál, bele hato'o ba Señor Prezidente, Governu no Povu Timor-Leste nia kondolénsia hirak klean tebes, hodi apresenta mós ami nia solidariedade tomak ba Indonesia tanba akontesimentu maka'as ida ne'e.

Ha'u mós satisfeito tanba bele hetan oportunidade atu espresa ba Señor Prezidente ami nia admirasaun kona-ba oinsá povu Indonéziu hatán ba atake ida ne'e.

Ema inosente barak maka lakon sira nia moris no barak maka kanek.

Maski nune'e, Povu Indonéziu la fo fatin ba terrór.

Ho lideransa Prezidente Jokowi nian, sira la ta'uk.

Hodi kontrola situasaun no hodi garante seguransa, maka Prezidente hetan hosi ninia Povu, konfiansa atu sira kontinua hala'o sira nia moris ho normalidade.

Resposta Indonézia nian ba atake ida ne'e laós surpresa ida ba timor-oan sira.

Ita hatene katak Indonézia país ida ne'ebé iha toleránsia no nia tau ba ás unidade iha diversidade.

Ita hatene katak Indonézia nasaun ida dinamiku liu iha rejiaun ida dinamiku liu iha mundu.

Ita mós hatene katak Indonézia maka país ida, hosi klibur ki'ik-oan país sira iha mundu, ne'ebé hetan kreximentu rápidu no sustentadu.

Iha kreximentu ida ne'e nia laran, ita mos hetan papél kik-oan ida – hori tinan naruk, maka Indonézia sai ona ita nia parseiru komersiál.

Tanba ne'e maka ita la hakfodak bainhira previzaun sira hatudu katak, iha 2050, Indonézia sei tama iha nasaun hat ekonomia mundiál nian, hamutuk ho Xina, Índia no Estadus Unidus Amerika.

Ita iha previléjiu bainhira hetan Indonézia hanesan país amigu, ita nian ida, no, ita satisfeito, tanba empreza indonézia nian sira maka lidera iha dalan atu hetan dezvoltamentu ba Timor-Leste.

Maski ita liu ona hosi pasadu ida difísil, maibé Indonézia ho Timor-Leste oras ne'e sai hanesan modelu global rekonsiliaun no dame nian, iha mundu ida ne'ebé hetok fahe malun.

Ita partilla illa ida no ita partilla futuru ida.

Ami ohin hetan sorumutu ida produtivu no pozitivu.

Ami kompromete-an atu remata ho ami nia konversasaun sira kona-ba fronteira terrestre sira iha espíritu vontade diak no solidariedade. Ita liu ona hosi dalan ida naruk no ita to'o ona fatin ida do'ok. Oras ne'e ita iha deit parte ki'i-oan ida atu defini no ita iha konfiansa katak ida ne'e la kleur tan ita sei to'o iha nebá no liu hosi espíritu amizade nian ida.

Ami mós iha oportunidade atu koalia kona-ba ita nia fronteira marítima sira. Indonézia bele orgullu ho papél lideransa nian ne'ebé nia hala'o bainhira elabora Konvensaun Nasoens Unidas nian kona-ba Direitu ba Tasi.

Timor-Leste ho Indonézia sei la'o tuir Konvensaun ida ne'e, no sei la'o tuir prinsípiu hirak kona-ba direitu internasionál sira, bainhira atu estabese ita nia froteira maritima sira.

Ita hatene kona-ba importánsia direitu internasionál no Direitu ba Tasi nian bainhira atu protéje direitu sira hosi Estadu nian sira no ba manutensaun pás no orden mundiál.

Pais rua ne'e rekoñese katak, fundamental, desde uluk kedas, atu hetan fronteira marítima sira ho klaru no definidu, no tanba ne'e maka ita sei servisu hamutuk atu bele hetan fim ida ne'e.

Señora no Señor sira,

Vizita ida ne'e atu reforsa liu tan ligasaun hirak forte ona entre nasaun rua

Ami partilla no insentiva relasasun hira interpesoál. Timor-oan liu rihun hat maka estuda iha Indonézia, iha ninia instituisaun ensinu nian hirak rekoñesidu.

Ohin, ami asina mós Memorandu Entendimentu importante lima.

Memorandu sira ne'e sei reforsa relasaun bilateral entre país rua ne'e, liu-liu iha área rekursu minerál no enerjiansira, juventude no desportu, klima no jeofizika no mós arkivu nasional nian sira.

Asinatura ba akordu sira ne'e sai tan hanesan testemuñu amizade nian ida no vontade diak ida entre ita nia país sira.

Ita agradese mos ba Indonézia tanba ninia apoiu maka'as ba prosesu adezaun Timor-Leste nian ba ASEAN. Hodi hakraik-an ita rekoñese konfiansa Indonezia nian ba iha futuru ita nia país nianno ninia apoiu ne'ebé metin iha adezaun ba ASEAN ne'e.

Indonésia maka sai hanesan país da-uluk rekoñese katak vizaun ASEAN nian hosi 'Sudeste Aziátiku nian ida' sei la konkretiza bainhira la iha partisipasaun hosi Timor-Leste.

Hau satisfeitu ho susesu boot hosi vizita ida ne'e no hosi vínkulu amizade nian ne'ebé hetok sai forte entre ita nia nasaun sira no ita nia povu sira.

Ha'u konvida Eselénsia Señor Joko Widodo, Prezidente Repúblika Indonésia nian atu hato'o liafuan ruma.